





祭孟淑明先生文



嗚呼痛哉吾師於正月廿八日捐館於十二月初二日聞訃已十閱月矣是日抱訃書於授經堂中踞而哭越三日乃設位奠焉念樞受知吾師在巴卯之秋聞以麟經卷薦之主司幾售復失吾師批卷畧云暫屈三年即期大發但不知子為何地英英也殊切仰慕勉旃勉旃樞讀此知吾師以國士遇之雖未能即附門墻以慰下慕之意其成我多矣迨壬午樞果售謁本房吳橫溪先生具告前科始末吳先生云孟公今任居庸司李明歲公車道中可相晤也樞過居庸



謁吾師相得甚歡甫入都門因先嚴卧病星夜奔回  
遂丁外艱未幾甲申國變矣避寇深山苟全性命尚  
能與吾師通尺一書耶 皇上定鼎樞乃提南宮選  
詞林改掖垣十年之間吾師任監司擢廉憲轉方伯  
兩舉卓異樞之敬我師與我師之愛樞者總屬道誼  
之一脉也嗣吾師由浙省藩司丁內艱請告不出樞  
亦陳情終養歸里樞居北塞吾師處西陲求一音訊  
不可得然而飲食夢寐未嘗忘也前歲辱吾師遠寄  
祝先慈八旬壽時先慈逝矣塋矣捧至主前哭而告  
之報書致謝未及達而夫子亦逝矣塋矣嗚呼痛哉

遠隔數千里生不獲進一觴死不獲執一紼樞將何  
以爲情耶嗚呼痛哉夫子之清操則楊關西之四知  
也夫子之惠政則魯中牟之三異也夫子之待人接  
物則朱光庭之春風周公瑾之醇醪也夫子之睦族  
傳家則范文正之義田顏魯公之家法也無論子弟  
門人哀悼之深即吾師轍迹所過之地居人有不聞  
而泣下者耶樞正擬從都門致奠適於康熙十一年  
閏七月初一日奉 召入都晤及趙君元李君乘龍  
何君誌又知師母亦相繼逝矣塋矣且二兄亦不幸  
逝矣塋矣樞聞之且驚且哀又將何以爲情耶嗚呼



痛哉師母壺德之正內助之賢無俟小子敘述而闡揚之二兄孝友之純哀毀之過更有闡揚所不能盡者回憶握手長安時竟成隔世矣嗚呼痛哉茲托何君附具薄奠聊將心喪並錄挽詩用存元韻詩曰太原門下士夢裏祝龐眉萬善心無忝一清世共知寄書生死恨聞訃性情移太華高千尺斯人不朽時煩為代讀墓前統乞鑿格

公祭徐雲門貢士文

嗚呼文章道義之交生死存亡之際士君子所為惻焉心悼者也若蔚代兩家之於雲老則重有悼焉者雲老才大而學博安貧而樂道有黃叔度林和靖遺風其為古文辭賦詩歌則又元稹白樂天之流也又手刻燭不足喻其敏妙郊寒島瘦未可做其清高以故蔚代間詩筒文槭往來幾無虛日而相成相規者每每在語言文字之外有精神氣味之投故於蔚則嘗策蹇過從雞黍是約或升堂拜母或促膝談心或檢質疑問難之書或商移風易俗之事至今庸齋中



東林堂全集  
杖屨宛然也於代則嘗風雨聯牀首偕為歡時而賦  
恒嶽之崔嵬咏桑乾之沆漭時而追漢文之故址弔  
蘇武之廢城至今鐸署中翰墨依然也而平城竟逝  
耶且蔚於雲老交非一日諸凡家世之譜牒祖宗之  
祠祀父母之喪塋兒女之婚嫁無不相聞亦無不相  
信前之陳情也而雲老喜焉後之奉 召也而雲老  
勉焉是蔚之進退出處亦惟雲老知之也雲老蓋近  
於道者也六經四子研究已深物理人情體驗更熟  
有道之氣令人肅然起敬而其虛懷善下問道於蔚  
則又抑然自處謙讓弗遑也昔安得不於雲老有深

契今安得不於雲老有深悼耶回憶壬子春西洪話  
別時意中頗有不能再見之感惟有著書數卷謂生  
平苦心具是焉代州曾見而愛之將欲剞劂以傳不  
朽至秋携稿北上畧加訂正即為付梓重詩文也重  
人耳甲寅冬梓人告竣歲杪寄平城乃篝燈展帙作  
而言曰是集也代州之表章和州之評定非蔚州而  
青雲之幾何不為覆瓿也嗚呼曾幾何時而雲老竟  
逝耶幸有子若孫能讀父書而且壽登大耋全受全  
歸猶見蔚代兩家家子列賢書以詩來賀喜溢言表  
其亦可以無憾耶獨自此而風雅之道不復聞規勉



之言不復聽老成持重之人不復親則蔚代之不能  
無憾於雲老可知矣意者精氣所結筆墨有靈貫徹  
於蜚狐勾注之遠感通於飲食夢寐之微彷彿若雲  
老之終老衡門讀書學道而猶未逝也是耶非耶二  
月廿旬都門聞訃乃於署務繁冗中搦管為誄灑淚  
致奠深愧弗躬靈其鑒之來格斯筵尚饗

祭傅哲祥同知文

曰嗚呼我公固所稱愷悌君子也亦限於數而溘焉  
長逝耶夫數不能限公有三焉念公之生則醫巫閭  
之間氣也其出也則值 聖天子應運而從龍者也  
其淵源也則理學大儒凌川先生之遠派也其育且  
教也則太翁太母兩賢之玉於成也天人協應諒非  
偶然其不能限公者一也公自起家鉅鹿令特舉卓  
異第一未幾刺申國守維揚悉以寬平奏績迨左遷  
金城以至攝蔚篆再攝渾源篆尊賢下士剔蠹恤商  
撫百姓如嬰兒仁心惠政載在人口其不能限公者



二也公事太母至孝晨昏定省而外每體慈德不忍苛民且手足骨肉之間友愛備至期於共爲君子無貽堂上憂及庭訓令子惟以讀書明理爲業又恐一日不近正人聞正言墜我忠孝家聲也至性至情太和元氣其不能限公者三也某等知交有素暨平日門下諸士固信公深矣即所部之縉紳父老以迄兒童走卒無一不爲公信者何竟限於數而溘焉長逝耶嗚呼痛哉樞尤有痛者先是攝篆至蔚甫下車即式問見訪首詢地方利弊樞謝不敏次以聖賢之學相質樞肅然起敬欲互相師友相與有成公益謙遜

不遑始知其志之不虛也復推錫類之孝升堂拜母爲文祝先慈八袞壽樞亦操拙筆進太母觴事竣歸金城猶歲時通問安否然未嘗一語及私也去年先慈見背公爲誄章哭之今年春擢恒郡貳守去留詩別樞於苦次有垂橐此行仍皂蓋舞斑還得侍兒觥之句蓋公不以遷秩爲喜惟以道里甚近得以迎養慈親菽水歡聚宦橐蕭然亦可樂也無何蒞任三月竟限於數而溘焉長逝耶嗚呼痛哉樞聞訃之日懸贈詩於益友堂中讀其詩如見其人淚從喉間出幾不成聲 天乎天乎爲之奈何惟願自今以往令弟



體兄之心善事慈闈順承儉德令郎體父之心敬守  
嚴訓光大家門庶可慰賢哲於地下表清白於人間  
樞依廬守制纔過小祥言不能文莫寫哀悼一詞一  
酌具告几筵靈其如在來格斯虔

祭徵君孫鍾元先生文

樞蓋慕先生之為人而始終神交者也樞生也晚竊  
幸於先生之生平與先生之學問得聞其梗概日以  
不獲親炙先生爲大憾今則已矣泰山梁木之悲其  
將奈何耶先生受天地中和之氣接聖賢誠正之傳  
氣節重於前朝孝友著於北地甘貧樂道暢一生仁  
義之懷致知力行淑當世狂狷之士吾國有顏子諸  
大夫登之薦章前身是靜修先皇帝賁以徵聘然  
而先生如祥麟威鳳之難爲致斯繼往開來之有所  
歸蘇門之巔百泉之上有大儒在焉返諸聖經直探



窮神達化之本參以儒說不諱異端曲學之非其立言也大而能平其教人也感而善入故天下四方率多有志於聖人之學立雪者得意聞風者傾心先生猶謂理學之傳代有所宗集成全書畧破畛域隨其資力各見性情天理人欲之途分而上智下愚之志奮俾前聖之絕學復續 聖朝之風教漸興此先生所為有體而有用也乎憶樞未通聞問之先則仰先生如山斗既奉教言以後則依先生為典型故捧先生壽詠於先慈者戊申歲也拜先生哀誄於先慈者巳酉歲也請先生指誨於馬君者庚戌歲也禱先生

疾病於 孔子者辛亥歲也約以乞骸之後過訪夏峰而先生却寄詩喜樞入都者壬子歲也手題學宗人瑞四字為先生九十壽者癸丑歲也正值 今上崇儒重道之時擬請存問者碩旦晚拜疏忽因用兵而止者甲寅歲也嗚呼好音頻寄受益已多先生孝友堂中函丈宛然樞竟無緣拜登耶五世一堂家庭間太和景象樞竟無緣目覩耶玉樹蘭芽森森階下樞僅見孝廉一孫此後可能一一叩其家學如對先生儀範耶且先生髦而好學誨人不倦今年四月六日劉子敷季自夏峰來傳先生語謂此生不能見蔚



州又讀先生手書策勉甚切謂樞光彩已映於蘇門之山光水影樞不敏頻年廢學德業罔進方愧無以報先生豈意先生遽爾辭世留茲絕筆耶倘樞同志有人觀摩有日不負先生臨終一言之期許先生得無默為啓誘耶五月廿四日既設先生手蹟數紙於廳事率子學誠哭奠矣勉修蕪章絮述本末敢煩構斯馬君及孝廉代讀而告之聊敘樞所以慕先生之為人而始終神交者有如此嗚呼人之相與義取相成哲人往矣樞也虛生遙申薄奠言出涕橫靈爽如在鑒此微情

祭少宰孫北海先生文

嗚呼先生 朝廷之文獻道學之宗盟縉紳之典型士林之師表也今往矣能不慟哉先生登第後自作令以至諫垣俱在明季某生也晚都不能記止見馬文肅成忠愍兩公手書一則云向與年兄極推光會萬孫北海令人盡如兩君子事亦豈至今日乎一則云使在都冠紳盡如光會萬孫北海天下事尚可為夫馬成兩公皆正人君子明季從容就義忠臣也其言如此先生之人品為何如哉先生以盡節未死之身 本朝舉遺賢擢吏垣長誓不與賊俱生迨申明



大義然後就職每歷一官必有建樹乃告病後猶有指爲溧陽之黨者於退谷中何損焉先生閉戶二十年讀書逾富窮理逾深養心逾純講學逾正著作凡數十種大約明五經闡四子佐國史重學校尊先儒闢異端尚經濟表人物勵風俗啓後學也此皆海內有目所共見者某復何言第某與先生定交垂二十年矣已亥秋某陳情養母爲設餞於青藤之下勉以力學贈以儒書與二三老友賦詩而別某家居十年尺素不入都門惟與先生千里談學質疑問難往復相通嘗於夢寐之中得聞道誼之語至今筆札盈

尺辨論成卷言言砥礪字字箴銘何日忘之耶壬子歲某奉召入都引見之次日登先生之堂握先

生之手聆先生之警效觀先生之儀容無異已亥相別時先生年已八旬耄而好學手不釋卷口不離理某每過梧軒談必竟日非希聖希賢之真諦即憂

國憂民之正言而且家庭之間勤儉孝友明理讀書時而携兩家子孫聚於一堂聽先生說古人嘉言善行陳仲弓荀季和遺風宛在也某於先生豈非志同而道合哉然猶有三憾焉聖主纂修明史典故未備稗官野乘聞見或恐失真若問之先生瞭如指掌



矣惜不獲仰佐編摩傳信萬世一也某自輯儒言錄一書彙集元明諸說以爲性理之續先與刁蒙吉訂其槩蒙吉作古仍待先生定其歸自惜虛度歲時缺畧未就竭蹶職業無暇商確二也先生之爵之齒之德鄉邦推重人望攸歸某曾待罪京兆擬請先生爲鄉飲大賓用增首善之光克重國老之典乃某未屆酒禮量移廷尉愧非賢主徒望嘉賓三也某抱此三憾意中竊謂先生年雖衰邁而議論亶亶氣從中出是爲壽徵豈意一疾不起耶憶仲秋問病同坐芥舟室中先生曰日來差愈但不過一年死耳請記

吾言今果然矣易箆前二日榻前執手語某曰自揣生平無愧心事林下讀書二十年從不問門外今撒手去矣命解衣相贈以志永別淚下各失聲復取遺詩遺言閱之先生二十年真學問至此絲毫不亂乃見得力處也獨是朝廷失一文獻道學失一宗盟縉紳失一典型士林失一師表某獨何心能不慟哉自初六初八哭先生後因署務繁冗寸心弗虔不敢設奠以俟潔誠之一日茲者豚兒從晉闈鄉試中式歸固先生素所愛而教之者令捧帛執爵隨而告於几筵哭於寢門欲再見先生於藤陰之下芥舟之室



實木堂全集  
促膝一話不可復得矣某獨何心能不慟哉惟靈有  
知諒必來格尚饗

祭內陞侍御王東臯同年文

嗚呼世道之淳澆人心之邪正豈不繫乎人哉夫既  
得人矣足以振國家之紀綱養天地之正氣不曲學  
以阿世不逢迎以事主不苟且於功名之階以滋海  
內隨波逐流之漸當其生也未嘗大展其所用而賈  
志以沒及沒之日天下之人爭惜之且歎息之或流  
涕不能已已者必曰國家之紀綱既不得此人而振  
之天地之正氣復不得此人而養之真世道人心之  
不幸也嗚呼何竟亡我東臯公哉公幼而敦重舉止  
語默即如成人下帷讀書凜凜庭訓時假蕭寺蓬蒿



蔽屣斷齋啖茹不易菜根風味故與貧安之若素迨  
舉於鄉鄉之人以真孝廉稱丙戌捷南宮以進士分  
校北闈得人甚盛初授行人奉差東省毫不與地方  
事惟登泰山謁孔廟即歸矣識者曰異日居清華必  
其嚴一介之操者也後特擢吏曹禁私謁杜苞苴  
外僚不能干以私或議黜陟大事有不合者輒力爭  
之羣聲不能奪寶坻為冢宰同真定梁公大興朱公  
特疏保薦清直請留掌選者十年廉名大著朝論咸  
服既而受上知拜官御史諫書數上其時有以貲  
郎進者欲授正印公白簡褫之巡視京城輯暴鋤奸

一時豪強斂跡不敢怒馬輕裘揚揚聯鑣於道上公  
之丰采為何如耶公既膺內擢仍管道事應差巡  
鹽而極力辭之兩監文武闡風清弊絕肅如也公之  
廉介自持始終不渝又為何如耶天下之人方望公  
一旦大用以光明俊偉之概為國家振紀綱以禮  
義廉耻之防為天地養正氣今聞公沒而自滿迄漢  
自士大夫以至兒童走卒識與不識無不流涕嘆息  
豈僅為公一身生死惜哉憶公以監禮南郊歸而  
感病卧牀聞嚴父訃即扶病奔喪哀毀不勝抱病讀  
禮既除服謂公行且北上矣豈意晨起遂肅衣端坐



而逝耶公伯仲五人而公居長其諸兄弟之光大家門亦未之或知然皆卓然成立亦可無手足憂所痛心者棄八十五歲之老母於北堂反借棺以殮子日夜撫子柩而哭之此某之所為流涕歎息終疑廉吏可為而不可為也將奈何耶幸而有子承祧異日克繼清白以竟公未竟之業天下之人將拭目望之又

不獨我二三同譜關切在懷矣嗚呼嶽嶽懷方乾坤不易生而正直沒而神明清剛之氣凌於川嶽太室

峯嶽洛水蕩漾其人云亡其道斯長維靈不遠來格

來享嗚呼尚饗

公祭烈女宋典姐文

為臣死忠為子死孝為婦死節皆人倫之大風化之美也有一於此舉世稱奇若夫娟娟弱息伉儷未諧方在納采之年遂引于歸之義如宋女者尤奇中之奇古今所不多見者也宋女賦性堅貞言笑不苟生長農戶未覩詩書媒氏合婚羅帕成禮蘭家負耒之子即為宋女舉案之人不意合卺未成蘭子夭折女聞訃而腸欲斷母力勸而志彌堅投繯未及結褵之期至死不改從一之節嗚呼烈哉女出農家一奇也裂蘭姓羅帕而縊二奇也氣絕後面目如生三奇也



以鄉隣之公舉衛官之申報廳道之查核學使具疏  
上聞奉 命建坊旌其烈紳士大夫復爲詩歌以  
表章之女其死而不死矣理宜合葬以慰幽魂從此  
烈女塚間木可連枝瓜可並蒂鳥可雙棲不獨一方  
之景仰實爲千萬人千萬世之景仰也女其有靈鑒  
茲公奠

祭夏師母牛氏文

樞喪母奄忽及禫師母辭世已九閱月於茲矣痛哉  
樞母逝而師母亦逝慈訓淑型相繼而隕樞且抱憾  
終天不能已世兄其何以堪耶竊念樞自髫年侍吾  
師門墻躬承教澤稔知師母閨範久矣唱隨之際相  
敬如賓井臼之間勤儉備至止生一子七齡就學聰  
穎而敦重識者以大器許之未幾吾師捐館舍庭訓  
不終師母堅守苦節以慈代嚴期玉於成雖茹檠和  
熊不是過也世兄果蚤列州庠矣尋拔 國雍矣尋  
又登北畿賢書矣捷至師母乃喜曰我未亡人也庶



幾可以報夫子於地下世兄捧賢書如捧檄然祇願長侍慈闈膝下也自是菽水承歡樞亦邀恩歸養樞母或過師母家師母亦或過樞母家相與話聞儀說女工論持家課子之心商崇儉黜浮之道家人聞之莫不凜然樞每於歲時伏臘恭問起居見師母步履壯健似中年人從未見其扶杖也樞私心竊幸曰壽不可量矣不幸樞母於己酉年見背去師母固無恙也乃命世兄就銓且曰吾老矣得見爾膺一命吾心慰矣世兄遂謁天官筮仕南皮令人曰疲邑也樞曰不然皮距對不十舍正好奉板輿時世兄抱病力

疾就任即圖迎養慮冬寒師母不能勝卜在來春和煦時孰意冬杪一疾竟不起耶目中僅見膺一命而不復沾綸綍之榮豈非數耶痛哉世兄迎養未逮湯藥未親含殮未視雖有諸孫在其抱憾終天者當何如也樞既痛樞母又痛師母兼痛世兄之無母同於樞之無母即欲升堂一拜而兩家慈闈寂然矣痛哉奈何嘗讀仲由之言曰昔由爲親百里負米親沒南遊於楚從車百乘累袒而坐列鼎而食欲負米百里豈可得乎樞與世兄均抱終天之憾淚不能止矣師母有靈想亦隨淚茲因世兄奔喪歸里虞祭至三



門墻弟子薄奠几筵文耶情耶酒耶淚耶伏惟來格

祭貞節妻母王氏文

痛哉痛哉某無母矣幸外母在如吾母在焉今外母亦棄而去耶此樞之所以痛也憶垂髫時曾親見外父顏色問病安否外母引至榻前令撫摩之未幾外父亡遺二女俱屬弱齡外母曲爲養育誓不改節俾二女嫁事次第完成外孫男女幾如林立樞自登第後官京師者十餘年每月則遣僕致詞自巳亥歸養在里歷十餘年每朔望則躬詣堂前親問起居如家庭禮蓋外母子視某某即母事外母也樞母去世矣外母目雖昏固無恙耳去年樞奉 召入都時跪外



母床下告別外母潛然淚下曰爾去可喜吾老矣不能再見爾矣樞忍淚寬慰之迨入都半年聞外母病尋且瘳逾半年又病竟不起此樞之所以痛也外母平日每以外父缺嗣爲憾今兩曾孫爲之承嗣而外母含殮之夕有姪並姪婦有次婿次女暨諸姪孫姪孫婦外孫外孫婦外孫女俱環視之以視他人生兒不立或浪遊遠方醫藥不謀衣衾不備有子而無子者爲何如也况外母賦性溫良治家勤儉言笑不苟壽登大耋冰霜之操達於彤庭垂於棹楔千萬襮爲之不朽外母亦復何憾哉樞所憾者一官羈絆不獲視含殮護靈輻惟有外母之長女奔而送於墓門之間俟封樹而返樞聞訃之日爲位於長安邸舍中焚香設奠率子媳而哭之茲托長兄象懸代告几筵又不獲躬致酌奠此樞之所以痛也靈其不昧伏惟尚饗



祭李孺人文

嗚呼孺人其逝耶何遽至此耶以孺人之淑德即壽  
登期願坐堂上受五世以下人稱觴進祝容未有艾  
也以孺人之淑德即眼見兒孫輩取科甲綰墨綬跪  
起床下次第問安咸荷 天子恩綸各捧 制書以  
進容未有艾也以孺人之淑德漸以內則風鄉里俾  
人知孝慈家尚謙和戶敦勤儉富忘其富貴忘其貴  
凡閭內之執婦道者咸奉之為女師容未有艾也何  
遽至此耶豈侍藥者愛護之至小心之過耶抑果數  
定必不能違耶嗚呼復何言哉憶昔先慈在世孺人



登堂拜祝先慈去世孺人撫棺悲痛曾幾何時玉步不復過寒家矣昨歲六十九歲之辰計及明歲古稀盡堂開筵兒孫舞綵姻親族黨無不歌詩而介壽者某若服闋入都恐不獲躬進一觴為壽此心歉然也孰知某未入都而孺人辭世某猶得伏地痛哭於寢門間耶某入都後遇有佳菓佳蔬欲奉吾母一啖不及矣即以奉吾母者轉以奉孺人佐令子菽水之歡亦不及矣豈不痛哉豈不痛哉茲於几筵前酌酒陳詞自愧弗躬又冗筆不克表淑德惟有遙拜致哀而已靈如有知伏惟鑒格

### 祭解安人文

解魏兩家年譜世好三十年相與之雅同於骨肉安人所稔知也憶昔辛卯歲安人隨法周年兄自濟陽令內擢戶曹時尊姑郭太安人迎養在京先太孺人亦在京遇歲時伏臘往來過從共談內則井臼諸事兒媳輦側耳聽之几上僅簡核數器而已金珠之飾兩家槩未有也先太孺人數稱安人聰慧質樸幼從父授經書下筆數千言可立就却無示及聞外者尋隨法周年兄赴池州太守任不幸值海逆猖獗奸人迎賊郡城內陷遂坐失守遣戍粵東安人從之越間



關萬里險阻備嘗恬如也未幾會 赦釋放安人育  
一女抱而歸以爲生還故鄉隨我法周兄守墳墓奉  
蒸嘗幸矣嗣是先太孺人去世聞安人每一念及未  
嘗不潛然泣數行下也今年四月終接法周年兄手  
書知有老蚌生珠之喜余京邸中兒女僕婢俱舉手  
加額以爲清白吏之報不意六月終安人訃至矣法  
周年兄亦附手書曰寒家失半壁天小兒女將何恃  
也嗚呼痛哉以安人孝而且賢於法周年兄有如賓  
之敬晚年琴瑟靜好旣得手摩二子玉茁蘭芽又復  
躬受 恩綸翟第珈珮聊酬半生之艱苦胡乃天奪  
之速俾法周年兄鼓盆而歌撫絃而歎喜中生哀添  
鬢上霜雪幾何耶獨奈匏繫一官不能酌酒躬奠聊  
陳蕪詞以申情愫靈其有知鑒之格之



祭三妹張孺人文

嗚呼吾妹何遽爾長逝耶吾妹屬纊在三月廿六愚兄聞訃在四月朔五吾家兄弟姊妹僅四人長兄大妹得以執手而訣愚兄獨於京邸設位而哭既不能見吾妹之面又不能撫吾妹之棺嗚呼天乎豈不慟哉慟之極無暇為誄矣然亦不得不收淚捉筆以寫愚兄身在宦途手足傷殘之苦况兼以述吾妹茹荼守節女中丈夫之賢名則愚兄之誄猶是淚也吾妹賦性溫良閨範嚴肅自妹丈去世所遺子女尚未成立吾妹以未亡人撫之教之婚之嫁之曰吾異日乃



可相見於地下也其經理家務則豐儉適宜其待宗親族黨則恩義兼盡或有以壺內難處之事相商者則又裁決明爽不喃喃作兒女語固婦人女子中所不多見者懿行彰彰指不勝屈今壽未及耆正宜享諸孤菽水之養酬三十年擘畫之艱倘有採風者舉以入告表其貞節夫亦可以無憾矣吾妹何遽爾長逝耶豈不慟哉然尤有深慟者愚兄生子最晚已酉一子聽星士家言宜寄養於母之多子者十二歲歸本家吉因而此子累吾妹神瘁心勞不啻鞠育計今十二年矣尚不忍遽以歸之魏者而倏焉遺之矣

愚兄將抱此子歸不知吾妹九原之心慰耶否耶憶壬子歲愚兄奉召入都時灑淚而別恐病軀未愈不復見吾妹幸而九年之間勉支瘦骨若從茲漸成衰朽不克勝重任早晚蒙聖恩放歸田里兄弟姊妹聚首輿亭以愚兄兩鬢霜雪視吾妹纔頰白耳夫何遽爾長逝耶嗚呼慟哉慟哉自去冬至今不半年而哭吾女又哭吾妹此愚兄之所以傷心而老景之所以不幸也有數存焉其奈何哉茲遣誠兒親致誄詞隨吾兄後哭而奠之靈其不昧鑒吾遠悲尚饗



祭曹子步妹文

嗚呼慟哉子步死耶其定數耶此固在天者也余何敢言第以其人言之五十八歲而即死余之所不解者也余自髫年受完我夫子之托與子步爲伴讀及夫子棄世又受兩師母之託於子步爲授書見子步孤苦零丁受人欺侮幾不能自存所有先人貲產爲貪官蠹役並豪強者橫吞殆盡幸其人僅存耳子步始發憤入州庠尋以本朝定鼎改武署渾源守戎未幾歸而耕薄田營生計粗有棲身餬口之業然而慷慨之性樂善之心往往重義而輕財扶危而濟困



凡人之死喪患難疾病鬪爭詞訟婚娶諸事或親或友地不論遠近時不論寒暑偶有相聞視如切已區畫處置廢寢忘食必至周旋曲當而後已亦祇求不愧其爲人未嘗居功也至於余家又屬至戚上自父母下至兒女之事無非子步之真心熱腸情至義盡者且余之門戶賴以看顧節操賴以周全肝膽賴以商確衰殘賴以體悉而今俱不可得矣慟哉子步在幼年則孤苦零丁之人也其在中年則慷慨樂善之人也其在晚年則真心熱腸情至義盡之人也此人當死耶不當死耶慟哉以子步之爲人在家爲孝子

在國必爲忠臣在鄉里爲長者在海內必爲義士此人當死耶不當死耶今竟死矣此皆余之所不解者也慟哉夫復何言哉獨余老矣憶子步於己未之春送余大兒入闈又於庚申之秋送次兒入京見余年過六十鬚髮多霜勸余加飡復望余首丘倘余犬馬力竭謬蒙 聖主鑒憐俯允乞骸之請生還故里子步已先我而逝余目中不見子步何以爲情即今聞訃而悼傷飲食頓減又增一番老况余所以深慟子步之爲人如此而竟死也其竟死者定數也其不當死者子步之生平爲人也可奈何哉京邸設位兒女



羣悲大兒感切躬奠總幃兼慰吾妹以安旅思靈其  
不昧來格來依尚饗

祭二妹曹孺人文

嗚呼痛哉余宦京邸者十年而手足骨肉之間傷殘  
殆盡矣豈不悲哉歲壬子余奉 召入都親若友送

別殷殷吾女拜吾膝吾兩妹侍吾側勸吾加餐子步  
妹丈送吾至京師凡長途之飲食起居旅邸之米鹽  
薪水皆躬為經理不假人手閱數月乃歸彼時余抱  
疴吾妹及吾女皆無恙也乃己未歲亡吾女庚申亡  
吾三妹今夏又亡吾子步妹文聞訃之後悲慟傷心  
淚不能止回憶至戚中當日慰余送余者止存吾妹  
一人耳勉抑哀衷為文一首詩六章哭之不自知其



言之長也隨遣吾兒歸對弔吾妹文兼慰吾妹勸其  
節哀抱孫以消晚年歲月倘余他日乞骸而歸見吾  
妹鬢髮蒼蒼矍鑠而來一敘十餘年手足濶別之情  
事且悲且喜即如見吾妹丈及吾三妹與吾女也嗚  
呼痛哉何吾妹今又不存耶吾妹年十三賦于歸即  
克盡婦道營葬其祖若翁拮据艱苦鄉里欺侮之事  
孀姑備嘗彼時門祚衰薄孝養不缺且事死如生歲  
時蘋蘩之薦三十年如一日吾妹之孝可以感格天  
心也吾妹文讀書於外吾妹獨理家務佐膏火資後  
因世出單丁欲置側室至於動色相勸吾妹丈終不

之從而此意亦閨閫所僅見者矣吾妹之德可以挽  
回定數也吾妹忠厚存心勤儉御下有人稍設雌黃  
者必力斥之曰勿傷厚道若不聽則遠去之弗與言  
而且華鈿不事粗糲自甘荆布之風度幾見之吾妹  
之懿行可以享長年膺厚福也何年甫週甲頓棄人  
間世耶天道果不可問耶意者吾妹丈於琴瑟之好  
晚年更篤家庭出入相敬如賓或園亭花開果熟必  
攜手同觀相視而笑彷彿鹿門遺意今不忍中道垂  
離竟相從於地下耶不然何天奪之速耶獨是余兩  
鬢多霜傷心疊見三年內四動悲哀一月中兩聞凶



訃老年何以堪此耶至他日乞骸歸里之時舉目淒  
淒余又不知如何感悼矣謹陳薄奠用表遠忱靈其  
有知來享來格尚饗

祭方伯亮四同年文

嗚呼先生其逝耶人之哭先生者謂學貫天人蔚然  
爲世儒宗是三晉一大人物也而鞅掌外吏終不獲  
仰承 顧問先生以天下才剔歷中外所至奏廉平  
第一而不獲竟其施先生德重於朝功施於野善溢  
於鄉而不獲享期頤壽以爲砥行修身者報是皆足  
爲先生哭嗚呼先生塵視富貴達觀死生亦何一足  
介先生意而所以哭先生者以先生至性隱德不欲  
人知卓然爲邦國望而今不可復見也先生家故貧  
早失怙恃依大父鞠育甫領解額色養不逮先生含



痛終身布衣藿食歷官數十年不乘輿不衣帛不一  
御梁肉人詰其故則嗚咽涕泗悲不忍言先生之孝  
何純也先生起家學博晉郎署外歷諸監司偉績彰  
彰未嘗悞朝廷一事而飲冰茹蘖未嘗取百姓一錢  
甫擢楚右轄聞彼處上官有陋例即引疾不履任願  
甘罷職策蹇歸里門間關萬里一僕隨之尤古人不  
逮家居時累經薦舉被 徵召復以老病不能應意  
似理亂勿與聞者然平居指畫山川險隘政務要領  
地方利若弊所當先後緩急憂勤隱恤惟寐始忘一  
遇事則慷慨擘畫義不引嫌每娓娓數千言為 國

家綢繆未雨之患又未嘗一日忘

君父先生之忠

愛何摯也先生以名進士位至方伯亦尊矣榮矣乃  
二十年閉戶蕭然躬耕數頃日與農夫牧豎飼牛羊  
操畚插爭勤惰於嚴寒溽暑之中雖老無幾微倦色  
先生之律已何高而苦也先生窮經讀史於古人書  
無不窺下筆數千言不易稿所著述等身人叩之冲  
如也問所得曰無有而其與鄉人交循循謙退雖遇  
臧獲不敢有傲容人亦幾不知為畢先生者先生之  
接物何謙和而下也此皆先生之隱德不欲人知知  
之亦未更僕數方諸古名臣隱君子誰為先生伯仲



者今天下乂安 聖天子敦崇耆舊愛惜人才使假先生以年關西操守范老甲兵足以肩大任決大疑當與永寧于北溟先生齊驅並駕利濟生民即不出而讀書田畔上下古今與太原傅青主同為 熙朝文獻亦人瑞也何竟奪我先生之速耶嗚呼痛哉朝之士大夫何所式鄉縉紳誰復為典型當事之訪得失禮於其廬者奚所諮而處焉父老疇與嬉遊後生小子將焉考德而問業四方之聞其道勃然而慕者烏乎景從迴念同譜諸君子落落晨星又將安倣而安仰也嗚呼筆至此而涕靈靈下矣哀哉尚饗

祭少叅王近微同年文

吾丙戌一榜登進士者四百人斯時也 國運方開人才蔚起與一代從 龍之彥接踵聯輝濟濟稱盛在內則翰苑臺省以至卿貳端揆不乏也在外則藩臬巡方以至節鉞不乏也若先生者具磊落英敏之才負光明俊偉之氣虎頭燕頤骨格異人以之任大事決大疑建大議經文緯武出將入相裕如也誰敢以百里才目之乃按序授官予恩縣一令時值地方初定伏莽甚多父老子弟不得安耕鑿上官且為城池倉庫慮先生笑曰善牧馬者去其害馬者而已今



寇在門庭而不除如民牧何遂親率健捕躬擐甲胄  
直入賊穴擒渠散脇如是者數而積寇靖四境安然  
後善用撫摩勸課農桑三年報最擢禮曹凡定制求  
才諸事無不實心擔當往往名公巨卿及都人士見  
之曰此明堂一柱也尋分憲慶陽其志甚壯秦西之  
人素聞先生名望之如景星慶雲獨是性戇直不肯  
媚上官履任年餘堅以病辭兩袖清風飄然去矣始  
也一縣令耳有上馬擊賊下馬草露布之畧而不獲  
大其用究也一監司耳有一介不與一介不取之意  
而不獲竟其施先生平生抱負將自是遂已耶墨莊

一卧不復作功名事業想集詩萬首寄托終身矣有  
知先生者累薦於朝再蒙徵用先生終不能就  
而不意病果膏盲矣嗚呼先生甫週花甲何奪之速  
耶哭先生者咸謂先生才氣骨格天壤所不多得  
朝廷所不常有是可悲也而不知先生居鄉德望更  
有堪爲矜式者林下二十年杜門不出於地方官長  
從不通一刺先是典試山左最號得人後門下士蕭  
公視學上谷先生力卻謁見成其大公試畢問寒溫  
一語足矣師友高風俱可千秋不朽至里中少年橫  
加欺侮毀門庭之額辱骨肉之親似難忍矣先生卒



不與較晚年涵養智深勇沉駸駸乎近於聖賢之自  
反者有如此語云雖無老成人尚有典型於今不可  
復見矣第是年既哭吾畢公亮四而先生又倏騎箕  
尾一時恒山以北太行以西頓失兩大人物為年譜  
悲耶為桑梓悲耶為世道人心悲耶不覺涕泗下而  
悲風起矣先生有靈請鑒格焉尚饗





